



Valair vala il pled discurri

Pled festiv dal 1. d'avust da la presidenta da la Confederaziun Simonetta Sommaruga

Charas conburgaisas e chars conburgais

Fitg bleras e blers da Vus han scrit al Cussegl federal durant las ultimas emnas. I ha dà plects d'encuraschament, ma er reproschas. Vus avais engrazià, e Vus avais dumandà per agid. La brev d'in pur da muntogna m'ha commuventà spezialmain. La crisa en connex cun il coronavirus ans haja tutgà tuts, ha el scrit. I stoppia vegnir mussà solidaritad. En la cuverta aveva el mess ina part da sia renta da l'AVS. Quests daners èn vegnids dads en il fratemp a quels ch'han gì da basegn.

En questas emnas difficilas m'ha la brev mussà exemplaricamain: La Svizra «tegnà pitg». Ella è ferma ed unida. Bleras personas, en l'entir pajais, han fatg sco quest pur da muntogna. Ellas han sustegnì ina l'autra durant questa perioda da crisa.

Per quai vi jau engraziar oz. Grazia a tut quellas e quels che han fatg las cumpras per vischins attempads. Grazia a tuttas e tuts che han procurà che noss pajais funcziunia, malgrà il virus: Al personal en ils ospitals ed en la vendita, als employads da la viafier ed als manischunzs da camiuns, als purs ed als lavurers da construcziun, a las tgirunzas en las chasas d'attempads. Tut questas personas ed anc bleras autras èn stadas qua per nus.

La Svizra «tegnà pitg», e quai er en ina situaziun uschè difficila. Nus avain gì avunda electricitad, il rument è vegnì dismiss, las scolas èn s'organisadas da nov. E la Confederaziun ha sustegnì nossas interpresas. Er las vischnancas ed ils chantuns han purschì lur agid. Tschertas presidentas communalas han schizunt telefonà personalmain a tut ils abitants attempads.

A medem temp n'èn las relaziuns commercialas cun noss stadis vischins mai vegnidas interruttas. Er durant il temp da corona èn il nov computer e l'ielì d'ulivas arrivads da l'exteriur. E nus avain cuntinuà da vender nossas maschinas e noss medicaments en l'Europa ed en tut il mund.

Tut quai è stà impurtant. Perquai che la Svizra dependa da quests barats. Nus duvrain noss vischins en il quartier, e nus duvrain relaziuns bunas e stablas cun noss vischins europeics. Oz ed en l'avegnir.

Il coronavirus ans dat anc adina da far en il mintgadi. Las infecziuns s'augmentan per il mument. Pervia da quai restain nus precauts. Ussa è puspè dumandada mintga singula e mintga singul da nus. Ed i dovra la Confederaziun ed ils chantuns. Mo cuminaivlamain pudain nus franar la nova derasaziun dal virus. Quai ans han mussads ils ultims mais, e quai fa curaschi.

La Svizra «tegnna pitg». En muments decisivs essan nus dapli che 26 chantuns ed otg e mez milliuns abitantas ed abitants: nus essan in pajais – en il center da l'Europa. La Svizra, quai essan nus.

Pli tard vegn ins forsa a dir: L'onn 2020 è stà l'onn dal coronavirus.
Jau sper però ch'ins vegn er a dir: Igl è stà l'onn da la solidaritad.

Charas conburgaisas e chars conburgais, jau giavisch a Vus tuttas e tuts da cor ina bella festa dal 1. d'avust!